

## Paul Kaletayi

# Wapiyalok Timothy Piyakan

### *Sàlà Kaleta Yawon*

*Timothy wechippù Asia Minor pon pe. Ichan wechippù màlà Jew pe molopai ikàipùnù wechippù Jew pe pùla Greek pe. Ailon tawon pe iwechippù Christ pàk umoine pe echii'ma molopai Paul patùnayi pe iwenappù molopai ipùikattànài pe itekale yekama ya yawàlà. Màlà yattai Paul uya sàlà kaleta menukappù ipyak.*

*Ikaletayi yau iichelupatok ipàk wechi màlà àsolùwau. Wapiya, iwalai pen enupantok so'chi tau tùwekkussen pàk Christ ya'lon kon panamappù ya. Wepùikattàntok wechi màlà tùweseposen pe tùwemali'maik pùla we'nà winà molopai yà'là yekkwa ton nà kùyali napù pùla iwechi winà tawonnan pe tok wechippù. Yakon pe, So'chi tau tükusan wotoko yamùk pàk iichelupappù molopai i'nai kasa Kaatù yapulàtok so'chi tau yeselu pàk. Yà'là kasa là so'chi yesak pe tùwessen molopai tok pùikattàn nan wechi tùwemassan pe yekamappù ya. Icholùwano pe Timothy panamappù ya wakù pe iwemattope Christ Jesus yapyoto pe, molopai tùpatalo'nan inkupù yamùk ailon tawonnan pùikattà pe pàk yenupappù ya.*

### **Ipantapàssak**

*Iwepyattàtok 1:1-2*

*So'chi molopai itau tùwe'wotokomasan yeselu 1:3—3:16*

*Timothy panamatok iwotokoyi pàk 4:1—6:21*

**1** <sup>1</sup>Sàlà màlà kaleta Paul winàpaino. Kaatù Kùpùikattànài molopai Christ Jesus napyontappù iulà, Christ Jesus enpen we'nàtok ke lepanài neunoko pe.

<sup>2</sup>Timothy, ailon tetok yau umu kulu kasa tùwessen piyak unmenukappù.

Wàpùlemayaik Kaatù Kùkàipùnù molopai Jesus Christ Kùyepulu uya elepa toppe wakù pe we'nàtok ke, usentuppantok ke, molopai echitonpa pe we'nàtok ke.

### **Ailon Pen Enupantok Winàpai Ekamappontok**

<sup>3</sup>Ephesus po ewechi i'che wessaik, eyekamappoppù uya kasa Macedonia pona utà yau. Tùulon kon kappon yamùk ailon pen enupantok ke kappon yamùk yenupayan molo, molopai tok yeletanùpù auya i'che wessaik.

<sup>4</sup>Ailon pen panton yamùk molopai tukkan tütamo kon yesek yamùk pàkànsau túsàulàmantok kon nonka toppe tok uya yekamakà, masapù-la sàlà uya neken usàulàmantok nepù màlà. Kaatù wotokoyi ailon tetok yau tükussen kupù yentai. <sup>5</sup>Ailon uchi'nùnmantok pàk tok menupaik esukenan ewan yapai tūuyàssen molopai tūwanmùla we'nàtok ewan yau yapai, molopai ailon tetok i'napailon kulu yapai. <sup>6</sup>Tùulon kon welattàsak man sàlà yamùk winàpai molopai tok utassak man pakko pe uselupantok yak. <sup>7</sup>Law pàk enupannan pe eppai tok man, tūse tūuselupatok kon ipàk ittu tok uya pùla man wapùla tūuselupatok kon ipàk wechi kulu là yà'là kasa ittu tok uya pùla ikupù tūuya'nokon kasa tok uchittu tūse.

<sup>8</sup>Ittu'nokon man Law wechi wakù pe, ikasa yapulà yau. <sup>9</sup>Sàlà ittutàk kon, Law wekkussak màlà wakù ton nà kappon yamùk ponalok pe pùla. Tūse Law yawolon kon pen ponalok pe, àli ku'nài nan, Kaatù yapulànnan pen, molopai àsà pe tūwessan ponalok pe, Kaatù pùnnon, kappon yamùk tükàipùnù kon wapùla tūsan kon wànnan ponalok pe, molopai kappon yamùk tükannan ponalok pe. <sup>10</sup>Law menukappù nàlà màlà tūnoppù kon pen pokonpe tūwessan ponalok pe, kàyik pokonpe kàyik wechi ponalok pe, kappon yonannài nan pùlayatta yepotok kon pe tūuya'nokon ipàk pe ponalok pe, kasei pe tūwessan molopai ailon kasa tūukaseitan kottù motau ponalok pe tūpatalà yà'làlà ku'nài nan ailon enupantok winàpai. <sup>11</sup>Màlàichi màlà enupantok yeposak itekale yau, uyemyak intùlùppù yekama toppe uya, Wakù kulu Itekale Eke Kaatù winàpaino.

### ***Tenki Tetok Kaatù Usentupatok Pàk***

<sup>12</sup>Tenki ukayaik Christ Jesus Kùyepulu kon pàk, ulepanàippù meluntà ke uwotokoyi kuttotpe uya. Tenki ukayaik uyensak ya tūwe'wotokomasen yek pe pàk molopai uyanùnsak ya tūwotokoyi yak pàk, <sup>13</sup>àli pe lànen uselupasak tūpàk tūse, tūtalumattà uya molopai tūmottùnpa uya tūse. Kaatù usentuppappù màlà upàk, masapùla unkupù ittui'ma pùla welaika ikasa kasa pàk molopai ailon te uya pùla lùppù lànen tūse. <sup>14</sup>Kùyepulu kon wessak wakù pe man upàk, upùlemasak ya man eke pe kulu ailon tetok molopai uchi'nùnmantok Christ Jesus yau nai'nùk ke. <sup>15</sup>Sàlà màlà ailon watetok, tanùnsen pe kulu iwechi, Christ Jesus uyàpùppù sàlà wolù yak àli ton pùikattàse, iulà mùkkàlà tok yentai eke pe kulu àli ku'nàippù. <sup>16</sup>Tūse ànù'là yentai àli pe kulu wechi pàk Kaatù usentuppappù màlà upàk tūwenukassen pen Christ Jesus wettok pàlikanài pe yentok ipàkàlà pe. Sàlà kupùppù ya màlà tūulon kon uya ailon te toppe Christ pàk molopai tàwàlàlà wema'nàtok yepotoppe tok uya. <sup>17</sup>Tàwàlàlà Kin pe tūwessen, tūumatta woton pen molopai yensak pen, tewinan Kaatù piyak, namantok molopai apulàntok tūlù màlà tàwàlà molopai tàwàlàlà! Emen.

<sup>18</sup>Umu Timothy, sàlà enupantok tūlù uya sàlà eyemyak. Kaatù Maimu uya Wakù Akkwalù yai yekamappù àpàk tūuselupa yau lùppù yawàlà

iwechi màlà. Tàwà màlà mayin ewepanta'matok ike pe nechii, wakù ponalok pe ewepanta'ma yawà, <sup>19</sup>ailon tetok auya eyewan yau nechii molopai tùwanmùla eyewan yau ewettok molo nechii. Tùulon kon wechippù ailon tetok tùuya'nokon maimu yawàlà pùla man molopai ailon tetok tùuya'nokon mattanùssak tok uya. <sup>20</sup>Tok kùlottau Hymenaeus man molopai Alexander, mùkyamlo untùlùssan Settan meluntàlù yemyak tok usenupa toppe, àli pe Kaatù pàk tùuselupa kon yeuletanùttoppe tok uya.

### *Yà'là Kasa Là Wàpùlemantok*

**2** <sup>1</sup>Wapiya kulu, tok ponalà'ne kappon yamùk pona àwàpùlema pa eyekamappoyan iulà. Tamù'nawàlà tok pùikattà toppe Kaatù uya màpùlemaik molopai tenki tetok auya tok pàk mekamaik Kaatù pàk. <sup>2</sup>Kin yamùk, molopai tamù'nawolon kon potolù yamùk ponalok pe, wema'nà toppe eppana àsà pùla molopai echitonpa pe, wakù pe Kaatù Kùpùikattànài tauchinpaik molopai iwalai iteselu pe tùwelaikaik we'nà toppe. <sup>3</sup>Sàlà màlà wakù molopai Kaatù Kùpùikattànài yauchinpa ya màlà, <sup>4</sup>Tamù'nawolon kon wepùikattà i'chelok mùkkàlà molopai ailon ittu tok uya i'che tùwessen. <sup>5</sup>Masapùla Kaatù mùkkàlà tewinan, molopai tewinan nàlà molo man Kaatù molopai kappon yamùk tawonnan yakletawon, mùkkàlà kàyik Christ Jesus. <sup>6</sup>Iwettùsak lùppù tamù'nawolon kon kappon yamùk pùikattà toppe tùuya. Sàlàichi màlà Kaatù nenpoikappù wolù yawon kon nùttu pe iwekkuttok yattai tok wepùikattà toppe. <sup>7</sup>Màlàpàk uchi sàlà uyeunossak kappon yamùk Jew yamùk pen yenupanài pe molopai ailon yekale yekamase. Ailon pe uselupa sàlà, kasei pe wechi pen!

<sup>8</sup>Mailàlà so'chi pàk we'nà yattai'ne kàyik yamùk Kaatù yemyak iwettùsak kon wàpùlema i'che wessaik temyatù kon tenkaik kakàik, tùwe'naikaik pùla wapùla tùusàulàmaik pùla.

<sup>9</sup>Uli'chami'chi wepontà nàlà wakù pe, tùttuik, tipippà kon tùwaputtàse i'che wessaik, tùusema'nonpaik kolù ke wapùla pearl ke pùla, teseluttàpàsse tùppai tùkappàsse pùla, molopai epekkèk kulu là pon ke tùwepontàik pùla, <sup>10</sup>tùse wakù pe iwelaikatok, Kaatù ittunnan welai-katok kasa. <sup>11</sup>Uli'chami'chi usenupa nen màlà eppana echii'ma molopai tamù'nawàlà àssàmùla entuppak tiuchittuse. <sup>12</sup>Enupan toppe tok uya tok ku'nài pen iulà wapùla kàyik yamùk yentai tok wettoppe ikupù uya pùla man. Tàwà eppana tok nechii. <sup>13</sup>Masapùla Adam konekappù màlà wapiya, molopai màlà tùpo nen uchi Eve konekappù màlà. <sup>14</sup>Molopai Adam pen mùkkàlà yennakasak lùppù, uli'chan làkku mùkkàlà yennakasak lùppù molopai Kaatù Maimu ikkwà'nàippù. <sup>15</sup>Tùse uli'chan wepùikattà màlà tùumunkàta winà, ailon tetok, uchi'nùnmantok, esuken we'nàtok molopai tùttuik wema'nàtok, wakù pe tipippà tùwaputtàik tùwepontàsen pe tùwechi yau tàwàlà.

*So'chi Yennài Nan*

**3** <sup>1</sup>Sàlà màlà ailon mayin. Kàyik wechi so'chi yennài pe kulu eppai yau, iwalai wakù wotoko i'che iwechi màlà. <sup>2</sup>So'chi yennài wechi màlà àli pe là ipantomù pùla, tewin neken inoppù, tùttuik tùwemassen pe, wakù pe itesek, wakù pe kaklan yamùk pàk tùwessen pe tùwùk tau, enupanài yek pe nàlà. <sup>3</sup>Tùwetùnsen pe pùla, wapùla àsà pe tùwessen pe pùla, tùse yà'làlà pàlikanài pe molopai echitonpa pe, pùlayatta pùnùn-manài pe pùla. <sup>4</sup>Tùwùk tawon kon yesak pe molopai wakù pe tùmunkà yamùk ku'nài pe tùmaimu yawàlà, tùnamasen pe tùwettoppe. <sup>5</sup>Masapùla ànù'là kàyik, tùmunkà molopai tùnoppù yesak pen molopai tok mainanpa tùuya ittunài pen wechi yau, yà'là kasa ken Kaatù so'chiyi yesak pe iwechi? <sup>6</sup>Emennak pe là Kaatù yemyak iwettùsak pe pùla, wakù pe tùwechi tùtonpa yentai pàk tùusenumenkasen pe iwechi tukaik, molopai tùtalumattàtok yepolo ya tukaik, Makui wechippù kasa. <sup>7</sup>Tùnamasen pe iwechi màlà so'chi tawon kon pen winà, iwekkuli'ma tukaik molopai iwekkawai'ma Makui uya tùplantok yak tukaik.

*So'chi Tau Pùikattànnan*

<sup>8</sup>So'chi Tau pùikattànnan wechi màlà wakù pe iwemattok molopai ailon pe, eke pe wain inchinài pe pùla wapùla pùlayatta pàk tùuseka'nonkasen pe pùla. <sup>9</sup>I'napailon ailon, Kaatù nekamappù lùppù kùpàk yawàlà tok nechii molopai iwalai kupùì tok tùwanmùla tùwettok kon pe. <sup>10</sup>Tok ittu màlà wapiya molopai tùttutok yentakasak tok uya wakù pe yau, tok we'wotokoma màlà Kaatù wotokoyi yau. <sup>11</sup>Tok noppù yamùk<sup>a</sup> wechi nàlà màlà wakù pe, àli pe tùuselupasen tùtonpa pàk pe pùla, wakù pe tùttuik tùwemassen pe, ailon pe tamù'nawolon yau tùwessen pe. <sup>12</sup>So'chi tau pùikattànài wechi màlà tewin inoppù molopai tùnoppù, tùmunkà tawonnan yesak pe molopai tok mainanpanài pe tùwessen pe wakù pe. <sup>13</sup>Mùkyamlo wakù pe wotoko ku'nài nan wechi màlà wakù pe ipantomù, molopai ailon tetok ya Christ Jesus pàk yau tùnamasen pe iwechi.

*Eke Tùttusen Pen Kaatù Yeselu*

<sup>14</sup>Sàlà menukai'ma, enpen wessaik uyapù eyense pàk tachin pe kulu tùpo pùla. <sup>15</sup>Tùse uko'mamù yau, sàlà kaleta uya atta we'nàtok Kaatù munkà yamùk pe yekama màlà, màlà nulànan Kaatù so'chiyi tau, ailon wakapuli molopai itesek yekama uya. <sup>16</sup>Ewaik lù'na'mà lù tetok pùn màlà ailon tetok kùuya'nokon eke kulu.

Iichenpoikappù kapon pun yau.

<sup>a</sup> 3:11 noppù yamùk wapùla so'chi pùikattànnan nossan yamùk

Ailon pe iwechi yenpoikappù Wakù Akkwalù uya.  
 Molopai inchelù yamùk uya yeneppù.  
 Tukkan kon kappon yamùk kùlotta Jesus yekale yekamappù  
 màlà.  
 Wolù yawolon kon uya ailon teppù ipàk.  
 Molopai yanùmùppù epùn pona.

*Timothy Yelupatok*

**4** <sup>1</sup>Wakù Akkwalù uya yekamasak man ailon pe, tùulon kon kappon yamùk uya ailon tetok nonka màlà pata weyu wenukapù winàkàik, ennakannan akkwalù yamùk maimu yawàlà tok wechi màlà molopai àli ton akkwalù yamùk uya enupantok maimu yawàlà tok wechi. <sup>2</sup>Sàlà enupantok màlà tùuyàssen kappon yamùk ennakannan kasei ton winà, molopai ittutok tok yewan uya weli'chak màlà, a'nek ayan nùpuluppù kasa. <sup>3</sup>Mùkyamlo walainon kappon yamùk uya enupan màlà, wemali'man wechi màlà ikasa pùla molopai yà'là yekkwa là kùyali màlà tùnassen pen, tukaik. Tùse Kaatù uya màlà sàlà yamùk kùyali konekappù ailon tawonnan molopai ailon ittunna nùnapù pe tenki tukaik. <sup>4</sup>Tamù'nawolon Kaatù nùkonekappù màlà wakù, molopai tùnulunpasen pe pùla iwechi, tùse tamù'nawolon wechi màlà tanùnsen pe tenki tei'ma. <sup>5</sup>Masapùla Kaatù Maimu molopai àwàpùlematok uya ikussak màlà tùwanmùla inapù pa.

*Paul Uya Timothy Panamatok*

<sup>6</sup>Sàlà yamùk usenupantok iwinà yekamasak auya ailon tawonnan pàk yau, wakù pe Jesus yapyoto pe tùwessen pe ewechi màlà, ailon itekale yau yemokkasak pe molopai wakù enupantok yawàlà iwessak pe. <sup>7</sup>Kappon yamùk mùkyamlo italumayi'chan, ailon ton pen nà panton yekamannan, tùse màlà yamùk uya enupantok yawàlà kechii, Kaatù uya neken enupantok yawàlà ewechi pa esenupakà. <sup>8</sup>Ànù'là yenupa aitun pe utàntoppe wapùla wenkalunnà toppe, màlà màlà wakù molopai tepeppù kenan, tùse akkwalù uya enupantok Kaatù wettok i'che kasa màlà wakù iwa tamù'nawolon yau, masapùla wema'nàtok sàlàpe molopai ewanawolok yau tàwàlàlà wema'nàtok ke lepan tùuya tesak ya pàk. <sup>9</sup>Sàlà màlà ailon watetok, tanùnsen pe kulu iwechi. <sup>10</sup>Màlàpàk uchi sàlà, wakù pe wema'nà'nokon molopai sa'man pe we'wotokoman'nokon i'che we'nà, masapùla enpen we'nàtok kon nonkasak nulànan Kaatù pàk pàk tamù'nawolon kon kappon yamùk Pùikattànài, mùkyamlo kulu ailon tawonnan pe nai'nannùk.

<sup>11</sup>Sàlà yamùk pàk tok yekamappokà molopai sàlà pàk tok yenupakà. <sup>12</sup>Ànù'là tùmà'le tukai'no eyentak mule pe là ewechi pàk, tùse ailon tawonnan uya yentok ipàkàlà pe ekkà, euselupatok yau, eyeselu yau,

euchi'nùnmatok yau, ailon tetok auya yau, molopai esuken àli pùla ewettok yau. <sup>13</sup>Tamùkke kappon yamùk tipili'che Kaatù Maimu yenkà, itekale yekamakà, molopai tok yenupakà uyàpù ponalà. <sup>14</sup>Wakù Akkwalù uya lepantok ayau nai'nùk tapulàse pùla kùkkupù. Kaatù Maimu yenpoi-kannan uselupappù ipàk lùppù, so'chi yepulu pe tùwessan uya temyatù kon tùlù àpona yattai elepappù lùppù ike. <sup>15</sup>Sàlà yamùk kupù pàk uchi ekkà. Ewemapù yawàlà ikukkà, tamù'nawolon kon uya Kaatù wettok i'che kasa ewena yentoppe. <sup>16</sup>Tùttuik emakkà molopai kappon yamùk yenupatok auya ike yenkà wakù pe. Sàlà yamùk kupù pàk ekkà, masapùla ikupù auya yau ewepùikattà màlà àmàlà molopai eyetannan nàlà.

### *Ailon Tawonnan Nùkupù*

**5** <sup>1</sup>Kàiyik eyentaino kùsàulàmai, tùse yekamappokà àkàipùnù yekamappo auya kasa. Umoine ton ikukkà ayakonnon kasa, <sup>2</sup>kokko yamùk lùwiwa asanon kasa molopai ema'nomi'chi àwàlichì ton kasa, tùwanmùla.

<sup>3</sup>Itayappù iweli'chak kon ipùikattàkà iwepùikattàtok iwìnà pùnnon kulu. <sup>4</sup>Tùse tùmunkà ke wapùla tùpayan ke iwechi yau, tàwà mùkyamlo nùmainanpai, sàlà kasa tùsan kon molopai tùkàipùnù kon, tùtamo kon, tùnok kon uya tùmainanpappù kon yepeppù pe, masapùla sàlà uya Kaatù yauchinpa màlà. <sup>5</sup>Tewinchalon kulu, ànù'là ipùikattànài woton pùn uya enpen tùwettok nonkasak màlà Kaatù pona molopai tùpùikattàtok yenna pàk iwechi ewalupà kaichalà molopai wei kaichalà. <sup>6</sup>Tùse mùkkàlà itayappù iweli'chak lùppù i'che tùwettok kasa tùwemassen, welikkassak màlà, nulà lànèn tùse. <sup>7</sup>Sàlà enupantok yekamakà tok pàk, ànù'là uya tok pataka àli pe wapùla tok yàulàma tukaik. <sup>8</sup>Tùse ànù'là uya tùtonpa mainanpa pùla iwechi yau, tùtonpa kulu, tùsan, tùkàipùnù winàpaino, ailon yawàlà pùla iwessak màlà yetapàssak ya molopai ailon tawon pen yentai kulu àli pe iwechi màlà.

<sup>9</sup>Ànù'là itayappù iweli'chak lùppù yesek tùlù pen màlà tùulon kon itayappù iweli'chak kon yesek kùlottak 60 yo'no ikili'chimo'chiyi tùse, tùse itepoi iwechi yau itùlù màlà. Molopai nàlà iwemali'masak pe iwechi màlà tewin itekkwà neken. <sup>10</sup>Molopai nàlà wakù ku'nài pe itekale nechiik, tùmunkà yamùk yemokkanài wakù pe pe, kaklan yamùk yanunnài tùwùk tak pe, Kaatù ponalok kon pùta kolùkanài pe, tùwettalumattàsan pùikattànài pe, molopai tamù'nawolon yà'là yekkwà là wakù ku'nài pe.

<sup>11</sup>Tùse ema'nomi'chi itayappù iweli'chak kon kùttùlù itayappù iweli'chak kon yesek kùlottak, masapùla ànkuppai tok wettok uya emali'mapai tok kupù yau, tùwelattàsan mùkyamlo Christ winàpai, <sup>12</sup>molopai wapiyalok ikupù tùuya'nokon teppù tùuya'nokon ikkwàtù tok uya pàk. <sup>13</sup>Yà'là pàk pùla tùuko'manse tok usenupasak màlà, yakontawàlà

tùusalà kon ke. Tùse nàlà tok uselupa là tùtonpa kon pàk echipalà molo-  
pai yauchin pe tok wechi yà'là pen pàk, yà'làlà yekamapaino kulu là pen  
nànen uchi yekama pàk. <sup>14</sup>Màlàpàk ema'nomi'chi itayappù iweli'chak  
kon wemali'ma i'che wechi màlà, tùmunkàtatok kon pe, tùwùk molo-  
pai tùmunkà yamùk mainanpa toppe tùuya, kùyeyaton kon uselupatok  
àli pe kùpàk yattai pùla. <sup>15</sup>Masapùla tùulon kon itayappù iweli'chak  
kon nùssan welattàkassak man Settan ya'là. <sup>16</sup>Tùse ànù'là nossan ailon  
tawon Kaatù pàk wechi itayappù iweli'chak kon nùppù yesak pe tùton-  
pa yamùk kùlotta uya, tàwà tok mainanpai, so'chi wotokoyi pe iwechi  
tukaik, iwepùikattàtok iwinà pùn kulu mainanpa toppe so'chi uya.

<sup>17</sup>So'chi yepulu yamùk wakù pe wotoko yanàì nan wechi màlà te'masan  
pe eke peiwa, mùkyamlo kulu tùwe'wotokomasan sa'man pe wakù ite-  
kale yekama pàk molopai kappon yamùk yenupa pàk. <sup>18</sup>Masapùla Kaatù  
Maimu,

“Paaka mùta kùsaulomùì a'naik yeppa ya tùse,” tawon,

molopai, “Tùwe'wotokomasen mùkkàlà te'masen,” tawon.

{DEU 25:4; LUKE 10:7}

<sup>19</sup>So'chi yepulu winàkàik uselupantok kùsetai asa'lon kon wapùla àsolù-  
wawon kon uya neken ipantomù nessak yau yeta màlà. <sup>20</sup>Tùse àli ku'nàì  
nan nùssan yàulàmakà molopai tok yekamappokà kappon yamùk yem-  
lotopo, amak yai pùla, tok tonpa yamùk yenu yappolù pe.

<sup>21</sup>Kaatù yemlotopo molopai Christ Jesus yemlotopo, molopai wakù  
ton inchelù yamùk yemlotopo, eyekamappo uya sàlà tùmuyaintaik, sàlà  
enupantok yawalà ewechi pa, ekkaichalà tùmenkaik pùla ànù'là pàk  
yà'làlà ànkupù kupù pa.

<sup>22</sup>Kesemittàpai eyemyatù tùlù auya ànù'là pona pàk Itepulu Jesus  
wotokoyi ponalok pe tok tùlù auya pàk. Tùulon kon uya àli kupù tonpa  
pe kechii. Wakù pe esuken ekkà.

<sup>23</sup>Tuna neken kichinchii, tùse mala lùkkwà wain inchikà eyipik pe  
àlotta pàkànsau, masapùla echipalà e'nek pe ewechi pàk.

<sup>24</sup>Tùulon kon kappon yamùk makuyi màlà tùusensen, molopai tok  
makuyi utà màlà tok wapiya ittuntok patassek yak, tùse tùulon kon makuyi  
usene màlà masaiwa. <sup>25</sup>Màlà kasa nàlà wakù eselu usene màlà, molopai  
màlà yamùk tùusensan kulu pen lànen uso'nantok pùla iwechi màlà.

**6** <sup>1</sup>Tamù'nawolon kon tepotolù ke nai'nannùk tàwà tepotolù kon tùna-  
maik kulu nechii, ànù'là uselupa àli pe Kaatù yesek molopai ina uya  
enupantok winàkàik tukaik. <sup>2</sup>Ailon tawonnan pe tepotolù kon yamùk  
wechi yau tok poitolù ton i'nùmla tok kuttak, masapùla ailon tawonnan  
nàlà mùkyamlo. Watùse, tàwà tepotolù kon yapyoto pe tok nechii wakù  
peiwa, masapùla mùkyamlo nepùikattàyai'nannùk tok wotokoyi yau  
mùkyamlo ailon tawonnan molopai tok pùnùn ton.

***Ailon Pen Enupantok Molopai Wakù Kulu Mamin***

Sàlà pàk kappon yamùk menupaik molopai sàlà yamùk mekamaik. <sup>3</sup>Ànù'là tùpatalon, ailon pen enupantok yekamanài molopai ailon Kùyepulu Jesus Christ Maimu molopai enupantok Kaatù winàpaino pàk ailon tawon pen wechi yau, <sup>4</sup>mùkkàlà wechi màlà tùtonpa yentai tùwekkussen pe. Molopai yà'làlà ittu ya pen màlà. Àsàulàmapai molopai e'naikapai iwechi mayin yamùk pàkàlà, molopai sàlà uya màlà kùlùmàlunnàtok nepù, tonpa yewanma'làtok, ànù'là mottùnpatok, àli pe usenumenkantok. <sup>5</sup>Molopai mùkyamlo usàulàma echipalà uya tok usenumenkatok mattanùssak màlà, molopai ailon pùnnon mùkyamlo. Tukke mamin yesak pe wenantok iwinà pe sàlà enupantok maimu yawàlà we'nà wechi pe yekama tok uya màlà.

<sup>6</sup>Ewaik, Kaatù ya'llà we'nà màlà kappon manài eke pe, itesak pe we'nàtok pàk tenki tawon pe we'nà yau. <sup>7</sup>Yà'là nepùppù ken kùuya'nokon wolù yak? Ipla! Yà'là yalà ken kùuya'nokon wolù yapai? Ipla! <sup>8</sup>Màlàpàk, teipa ke molopai tùpon ke we'nà'nokon yau, màlà pàk tenki tawon pe we'nà màlà. <sup>9</sup>Tùse mùkyamlo tukke mamin i'chelok kon wena màlà tùttutok kon yak molopai tùplantok kon yak molopai suwalai là àsà là ànkuppai we'nàtok, uya màlà kappon yamùk pàlàka mattantok àsà kulu yak. <sup>10</sup>Masapùla pùlayatta pàk ewan tùtok màlà tamù'nawàlà yà'là yek-kwa àli uyàttok iwinà. Tùulon kon wechippù man enepopai kulu màlàyau tok utàppù miya ailon tetok winàpai molopai tok usewankono'mappù, màlà uya tok yewan ikkwàssak.

***Iponalà Kulu Timothy Panamatok***

<sup>11</sup>Tùse àmàlà mùkkàlà Kaatù ponelok kàyik, sàlà yek kwa ton winàpai ekkà. E'wotokomakà sàlà yamùk yepolo pa molopai ikasa, wakù pe Kaatù yauchinpanài pe ewechi pa, ailon te toppe, àtonpa tù'nùnmaik, yà'làlà pàlika pa molopai ten pe alomùla ewechi pa. <sup>12</sup>Wakù pe epanta'makà ailon tetok auya yau meluntà pe ewechi pa, molopai tàwàlà wema'nàtok yepokà àponalok pe, masapùla sàlà wema'nàtok yak màlà Kaatù uya àkà'mappù “Ailon tawon iulà” tesak auya yau, tukkan kon yetannan yemlotopo. <sup>13</sup>Kaatù yemlotopo eyekamappo uya sàlà umaimu yawàlà ewechi pa. Mùkkàlà wema'nàtok tùnài tamù'nawolon yak molopai Christ Jesus, Pontius Pilate yemlotopo wakù yekamanàippù yemlotopo. <sup>14</sup>Sàlà enupantok maimu yawàlà ekkà, molopai esuken ekkà molopai yà'làlà iwalai pen pùla, Kùyepulu Jesus Christ Weyu usenpoika ponalà. <sup>15</sup>Wakù Kaatù mùkkàlà tewinan kulu Itepulu tamù'nawolon kon kin yamùk Kinù, molopai itepulu yamùk Yepulu. <sup>16</sup>Mùkkàlà neken tewinan tàwà-làlà tùwemassen. Tùwemassen mùkkàlà akkwa ànù'là nepolo itenpatau pen. Ànù'là uya yensak pùla iwechi màlà, molopai ànù'là uya yene pen



màlà. Tàwà mùkkàlà ponalok pe namantok molopai tàwàlàlà apàikkek pe we'nàtok nechii! Emen.

<sup>17</sup>Tukke itemamin nai'nannùk sàlà motau wema'nàtok yau yekamappokkà. Itekkwa pe tok kùsekkuttak molopai enpen tok kùsettak temamin kon sa'man pe pùla tùwe'la'chimasen pe nai'nùk pàk, tùse Kaatù pàk làkku enpen tok nechii, mùkkàlà tùweleutaik pùla tamù'nawolon ke lepanyai'nùk tapulàsen pe nai'nùk ke. <sup>18</sup>Wakù kuttoppe tok uya yekamakà, eke pe tùutauchinpaik tok wettoppe tunkupù kon yau, alikyek pe tùwe'lepasan pe tok wettoppe. <sup>19</sup>Sàlà kasa tok uya màlà temamin kon pilipù ewanawolok woton yapon pe molopai nen uchi tok uya wema'nàtok yepolo màlà ailon kulu wema'nàtok.

<sup>20</sup>Timothy, màlà itùsak lùppù eyemyak ikukkà wakù pe. Kaatù pùnnon uselupatok yà'là pen nà kùsetai, wakù kasa nùsetayai'nùk tùse iwalai pen enupantok. <sup>21</sup>Masapùla tùulon kon kappon yamùk uya, “ittutok yesak pe wessaik,” tesak man, ailon tetok tùuya'nokon ipàkàlà yenu'mappù tok uya màlà màlà pàkànsau.

Wakù pe Kaatù wettok wechi tamù'nawàlà apyau'nokon màlà.